

1953

禮教化民



聖俞象解卷之三

三

承宣堂

卓茂字子康。南陽人也。元帝時。茂學長安。事博士江生。習詩禮。及曆筭。究極師法。時稱爲通儒。嘗覓仁恭愛。鄉黨故舊。雖行能與茂不同。而皆愛慕欣欣焉。初辟丞相府史。事孔光。光稱爲長者。嘗出行。有人認其馬。茂問之曰。子以馬幾何時矣。對曰。月餘日矣。茂有馬數年。心知非是。解以與之。而自挽車去。將去。顧而謂曰。若非公馬。幸至丞相府歸我。他日馬主別得。乃詣丞相府歸馬。其好讓不爭如此。後以儒術舉爲侍郎。給事黃門。遷密令。吏民親愛。不忍欺。人嘗有言部亭長受其米肉遺者。茂辟左右而問之曰。亭長無故從汝求乎。抑汝有事囑之而受乎。將汝平生自以恩意遺之也。人曰。吾自往遺之。茂曰。遺之而受。何故言耶。人曰。竊聞賢聖之君。使人不畏吏。吏不敢取人。今我畏吏。是以往遺。遺之而受。故來言耳。茂曰。汝爲蔽民矣。凡人所以貴於禽獸者。以其有仁愛。知相敬事也。今隣里長老。歲時尚致餽遺。况吏與民哉。凡人之生。群居雜處。故有經紀禮義。以相交接。汝獨不欲修之。寧能高飛遠走。不在人間耶。亭長素善吏。歲時遺之。禮也。人曰。旣如此。律何故禁之。茂曰。律設大法。禮順人情。今我以禮教汝。汝必無怨惡。以律治汝。汝將何所措其手足乎。一門之內。小者可論。大者可

殺也。且歸念之。初茂到縣。有所廢置。吏人皆相與嗤笑。鄰邑聞之。亦鄙其無能。河南郡爲更置守宰。茂不爲嫌。治事自若。數年之後。教乃大行。王莽秉政。遷京部丞。密人無老幼。皆涕泣相隨送。數日不絕。及莽居攝。茂以病免歸鄉里。光武卽位。下詔褒茂。以茂爲太傅。封褒德侯。食邑二千戶。賜几杖車馬。衣一襲絮五百斤。復以茂長子戎爲大中大夫。次子崇爲中郎給事黃門。建武四年。茂夢。賜棺槨冢地。車駕素服。親臨送葬。


此一幅像。是寫卓茂循良之忠也。卓茂字子康。南陽人。元帝時遊學長安。師事博士江生。習詩禮。及曆筭之術。究極師所傳之法。人皆稱爲通儒。性寬仁恭愛。凡鄉黨故舊。雖志行才能不與茂同。無不欣欣愛慕者。初辟爲丞相府史。從事孔光。光稱爲忠厚長者。嘗出行。有人誤認其馬。茂問曰。子馬之亾。曾幾何時。對曰。已月餘日矣。茂有此馬。業經數年。知其非是。但人意甚執。勢難強爭。遂解與之。自挽車去。將去。復顧謂曰。倘此非公馬。可至丞相府還我。他日馬主於別處得所。亾馬乃親詣丞相府還之。其好讓不爭如此。尋以儒術舉爲侍郎給事黃門。遂遷密令。吏民俱相親愛。不忍有欺。人有告言部亭長受其米肉餽遺者。茂

辟去左右。問之曰。所遺米肉。亭長並無他故。從汝強索乎。抑汝有所囑托而彼受之乎。將汝自以恩意往來而遺之也。其人曰。是吾自往遺之。茂曰。汝遺而受。何故復言耶。其人曰。竊嘗聞賢聖之君。使人不復畏吏。吏亦不敢擅取於人。今我於吏。既有畏心。不得已而往遺。遺之而受。故來告言耳。茂曰。若然。則汝爲壞民矣。凡人所以爲萬物之靈。貴於禽獸者。以其有仁愛之心。彼此交相敬事也。今隣里於長老。遇歲時。尚致餽遺。况吏與民而漠然乎。吾人群居雜處。必經之以禮。紀之以義。互相交接。汝獨置此不務。寧能如鳥

之高飛。獸之遠走。不復居在人世耶。亭長素稱善吏。歲時遺之。禮也。其人曰。既如此。律又何故禁止之。茂曰。律設大法。所以儆無良也。禮順人情。所以廣教化也。今我以禮教汝。俾汝相親相敬。汝必無怨惡。若以律治汝。深文巧詆。槩繩以法。汝將何所措其手足乎。一門之內。誰無過惡。其小者可論罪。其大者可論殺。是齊以刑。不如齊以禮之明驗也。汝且歸念之。茂初到縣時。政事偶有興革。人皆嗤笑。鄰邑聞之。亦鄙其無能。河南郡守。爲另設守宰。茂意絕無所嫌。但照常治事自若。及數年後。教化始大行。王莽秉政。遷京部

丞密邑人民。無分老幼。皆涕泣相隨遠送。行者數日不絕。及葬居位攝政。以病乞免歸里。光武卽位。乃下詔褒茂。以茂爲太傅。封褒德侯。食邑二千戶。賜几杖車馬。衣一襲。絮五百斤。又以茂長子戎爲大中大夫。次子崇爲中郎。給事黃門。建武四年。茂薨。賜棺槨冢地。帝車駕素服。親臨送葬。賈誼有言曰。夫移風易俗。使天下回心而嚮道。類非俗吏之所能爲也。俗吏所務。在於刀筆筐篋。而不知大體。欲知大體。非秉禮以爲教。其孰能從之。雖然。日計不足。歲計有餘。茂治未及數年。徒爲人嗤笑之資而已。欲教化大行。難哉。宜乎古人之重久任也。光武正位。首封茂褒德侯。賜予優渥。榮及二子。哀歿有贈。素服成禮。其恩待之典至矣。東漢循吏。照耀史冊。而國祚賴以延長。有由也哉。

暮夜却金




聖諭修解卷之三  
楊震遷東萊太守。當之郡。道經昌邑。故所舉荊州茂才王密爲昌邑令。謁見。至夜。懷金十斤以遺震。震曰。故人知君。君不知故人。何也。密曰。暮夜無知者。震曰。天知。地知。子知。我知。何謂無知。震性公廉。不受私謁。子孫嘗蔬食步行。故舊或欲爲開產業。震不肯曰。使後世稱爲清白吏子孫。以此遺之。不亦可乎。

此一幅像。是寫楊公操履清潔。不欺暗室之忠也。楊公遷爲東萊太守。當赴任。道從昌邑經過。公舊日所薦舉荊州茂才王密者。適爲昌邑令。來謁見。至夜。乃懷金十斤以遺公。公曰。我爲君故人。知君之賢。故相薦引。今君反不知故人生平志行。何也。密曰。暮夜並無人知。卽受之。何遽損令名乎。公曰。幽則有天地知之。明則有汝我知之。何謂無知。若謂人不知而姑受焉。是自欺其心也。欺心卽欺天矣。天其可欺也乎。公性至公廉。不受私人請謁。子孫惟粗飯。出入並無車馬。步行而已。親戚故舊。或欲爲購田產基業。公不肯曰。使後世稱爲清白吏子孫。世德相傳。所遺多矣。豈區區良田美產而已乎。語曰。廉吏不可爲也。觀於楊公。廉吏亦何不可爲也哉。



納刀韓中



三合明象昇卷之三

承宣堂

李光弼嚴毅沉果。有大畧。祿山之亂。元宗求良將以問子儀。子儀薦光弼。詔攝御史大夫。持節河東節度副大使。以兵五千救常山。執賊將安思義。不殺。常山自顏杲卿歿後。郡爲賊區。露齒蔽野。光弼酌而哭之。爲賊幽閉者。出之。厚恤其家。民心大悅。時賊將攻饒陽。光弼問計於思義。答曰。今軍行疲勞。宜且按軍入守。料勝而出。賊兵焱銳。非能持重者也。光弼曰。善。明日。思明兵二萬傅堞。光弼以勁弩五百射之。賊退。徙陣稍北。光弼出其南。夾滹沱而軍。是日。饒陽賊五千至九門。光弼諜知之。提輕兵。斂旗鼓。伺賊方飯。襲殺之。且盡。郭子儀收雲中。詔與光弼合擊賊。思明大敗。走趙郡。光弼急攻趙。一日。拔之。至德二載。思明率十餘萬攻光弼。時銳兵悉赴朔方。而麾下卒與團練烏合之衆。不滿二萬人。諸將皆懼。議修城備賊。光弼曰。太原城周四十里。賊垂至而興役。是未見敵。先自困也。乃帥士卒及民。於城外鑿濠以自固。作塹數十萬。衆莫知所用。及賊攻城於外。光弼用之。增壘於內。壞輒補之。思明圍太原月餘。不能下。光弼募善工。穿地道。賊宴城下。令倡優居臺上。仰而侮詈。光弼遣人從地道中。曳其足而入。臨城斬之。自是賊行皆視地。會祿山歿。慶緒使思明歸守范陽。留蔡希德等圍太原。

光弼出敢歿士搏戰。斬首七萬級。希德委資糧遁走。太原圍乃解。史思明復縱兵河南。乃加光弼太尉兼中書令。代郭子儀爲朔方節度兵馬副元帥。左廂兵馬使張用濟承子儀之寬。憚光弼之令。與諸將頗有異議。光弼出次汜水縣。用濟單騎來謁。卽斬于轅門。諸將懾伏。許叔真降賊。思明乘勝西嚮。光弼趨東京。思明至偃師。光弼悉軍趨河陽。身以五百騎殿。當石橋進。甲士夜持炬徐引。部曲重堅。賊不敢逼。賊使驍將劉龍僂以騎五十挑戰。嫚罵光弼。光弼命白孝德斬其首以還。光弼因與戰。大破之。初光弼謂李抱玉曰。將軍能爲我守南城二日乎。抱玉曰。過期若何。曰。棄之。抱玉許諾。卽給賊曰。吾糧盡。明日當降。賊喜。歛兵待。抱玉已繕完。卽請戰。賊忿欺已。急攻南城。抱玉出奇兵夾擊之。俘獲過當。光弼使荔非元禮守羊馬城。植小旗城東北隅。望周摯軍。摯恃衆直逼城。麾兵填塹。八道並進。光弼諭元禮曰。中丞視賊過。兵不顧。何也。報曰。公欲守耶。戰歟。光弼曰。戰。曰。方戰。賊爲我實塹。復何怪。光弼曰。吾慮不及此。公勉之。元禮遂出戰。摯軍小却。元禮以敵堅。馳還示弱。以怠其意。光弼怒。使召元禮。元禮答曰。方戰不及往。請破賊以見。因休柵中。良久。顧麾下曰。向公來召。殆欲斬我。闔歿有

名。無庸受戮。乃下馬持刀。瞋目直前。銳士堵而進。左右奮擊。一當數人。斬賊數百。摯收兵。與安太清合衆三萬。復攻北城。光弼歛兵入。登陴望曰。彼軍雖銳。然方陣而囂。不足虞也。日中當破。乃出戰。及期未決。召諸將曰。彼強而可破者。亂也。今以亂擊亂。宜無功。因出賜馬。分給郝廷玉等。光弼執大旗曰。望吾旗。麾若緩。可觀。使若三麾至地。諸軍畢入。生歿以之。退者斬。既而憑堞望。廷玉軍不能前。趨左右取其首來。廷玉曰。馬中矢。非却也。乃命易他馬。有裨將援矛刺賊洞馬腹中。又有迎賊不戰而却者。光弼召援矛者。賜絹五百匹。不戰者斬。光弼麾旗三。諸軍爭奮。賊衆奔敗。斬首萬餘級。俘八千餘人。馬二千。軍資器械以億計。擒周摯。徐璜玉。李秦。授惟太清挺身走。思明未知。猶攻南城。光弼驅所俘示之。思明乃惧。始光弼將戰。內刀于鞞曰。戰危事。吾位三公。不可辱於賊。萬一不捷。當自刎以謝天子。及是西向拜舞。三軍感動。寶應元年。進封臨淮王。夔年五十七。光弼用兵。謀定而後戰。能以少覆衆。治師訓整。軍中指顧。諸將不敢仰視。初與子儀齊名。世稱李郭。戰功推爲中興第一。其代子儀朔方也。營壘士卒。麾幟無所更。而光弼一號令。氣色乃益精明云。

此一幅像。是寫李光弼誓死疆場之忠也。李光弼方嚴強毅。深沉果斷。有遠大志畧。安祿山初亂。元宗欲得良將討之。以問郭子儀。子儀乃薦光弼。於是詔命光弼攝御史大夫。持節河東節度副大使。率兵五千救常山。執賊將安思義。赦而不殺。常山自顏杲卿歿後。其郡盡爲賊境。殺害無辜。白骨蔽於原野。光弼以酒酹而哭之。其爲賊所幽閉。盡出而厚恤其家。民心由是大悅。時賊攻饒陽。光弼問計於降將思義。思義答曰。今軍遠行疲勞。宜且按軍入城。爲保守計。料其可勝而後出。賊兵雖焱急果銳。然不能持重。俟其怠而擊之。易勝也。光弼曰。善。明日思明以兵二萬附城堞而攻。光弼以強弩五百射之。賊退。遷其陣稍北。光弼於是出其南。夾滹沱河而軍。是日饒陽賊五千至九門。光弼探得之。乃提輕兵。歛息旗鼓。偵賊方飯。掩其無備。殺之殆盡。會郭子儀收雲中。詔子儀與光弼合擊賊。思明大敗。走據趙郡。光弼急攻趙。一日遂拔之。至德二載。思明率十餘萬攻光弼。時精銳之兵。盡調赴朔方。而麾下卒。與團練烏合之衆。不滿二萬人。諸將皆以衆寡不敵爲懼。乃議修城以備賊。光弼曰。太原城。周圍共四十里。今敵將到。而興工役。民是未

見敵先自取困也。乃親帥士卒及民於城外鑿濠以自固。又作塹數十萬。衆莫測其意。及賊來攻城於外。光弼用之以增壘於內。有壞輒補。思明圍太原月餘不能下。光弼募善工穿地道。賊設宴城下。令倡優居臺上。仰首狎侮爲罵詈。光弼遣人從地道中密曳其足而入。臨城斬之。自是賊行走。自皆視地。祿山旣歿。慶緒使思明回守范陽。留蔡希德圍太原。光弼出敢死士搏戰。斬其首七萬級。希德委棄資糧遁走。太原圍遂解。史思明復縱兵於河南。乃加光弼太尉兼中書令。代郭子儀爲朔方節度兵馬副元帥。左廂兵馬使張用濟素安子儀之寬。憚光弼令嚴。與諸將頗有異議。光弼出汜水縣。用濟以單騎來謁。卽斬于轅門。諸將咸懾伏。許叔冀因戰不利降賊。思明乘勝西嚮來攻。光弼引軍趨東京。思明至偃師。光弼悉軍趨河陽。自以五百騎殿後。當石橋進。命甲士夜持炬。徐引而行。部曲持重堅固。賊不敢近。賊使其驍將劉龍仙以五十騎挑戰。嫚罵光弼。光弼命白孝德斬陳龍仙首以還。光弼因與戰。大破之。先是光弼謂李抱玉曰。將軍能爲我守南城二日否。抱玉曰。期過二日如何。曰。棄之。抱玉應諾。卽詐告賊曰。吾糧盡。明日當出降。

賊喜。歛兵以待。抱玉繕理完備。卽復請戰。賊怒其欺已。急攻南城。抱玉出奇兵內外夾擊之。俘獲無算。光弼使荔非元禮守羊馬城。樹小旗於東北隅。望周摯軍。周摯自恃兵衆。直進逼城。麾其兵填塞坑塹。八路並進。光弼諭元禮曰。中丞視賊經過。兵不之顧。何也。報曰。公欲固守耶。抑或出與戰歟。光弼曰。戰。曰。戰則賊爲我填塹。過而不顧。復何怪焉。光弼曰。吾思慮初不及此。公當勉之。元禮遂出戰。摯軍小却。元禮以敵軍堅。乃馳還。示之弱。以怠其意。光弼怒。使人召元禮。元禮答曰。方與賊戰。不及往。請破賊以見。因休息寨

柵中。良久。顧麾下將士曰。向者公來召我。始欲斬我也。男兒與賊鬪。尙有忠勇名。無空受戮。爲不義鬼也。乃下馬持刀。怒目直前。精銳之士。如堵而進。左右奮擊。無不一當十。斬賊數百級。摯復收兵。與安太清合衆三萬。復來攻北城。光弼歛兵入。登陴望曰。彼軍雖銳。方列陣而囂。是將不重。無足慮也。計日中當破之。乃出戰。及期。勝負猶未決。召諸將。謂曰。彼軍甚強。其可破者。以亂而不整也。今我以亂擊亂。固宜無功。因出賜馬。分給郝廷玉等。光弼自執大旗曰。諸軍第望吾旗。如稍緩。可各觀。便宜若吾旗三麾至地。諸軍

盡入敵陣。生歿以之。退者立斬。旣而憑堞望廷玉軍不能前。趣左右斬其首來報。廷玉曰。所乘馬中矢。非退却也。乃命易他馬。有偏將援矛刺賊。直洞馬腹。又有迎賊與敵。不戰而遂却者。光弼召援矛者。賜絹五百匹。其不戰者。立斬。光弼麾旗三。諸軍爭奮擊賊。衆奔敗。斬首約萬餘級。俘獲八千餘人。馬二千疋。軍資器械以億計。擒其驍將周摯。徐璜。王。李秦。授等。惟太清孤身走脫。思明尚未知。猶攻南城。光弼驅所俘賊將示之。思明乃懼。始光弼將戰。納刀於鞞內。曰。戰危事也。吾位列三公。不可受辱於賊。萬一不捷。當自刎以謝天子。及是乃西向拜舞稱賀。三軍爲之感動。寶應元年。進封臨淮王。薨年五十七。光弼用兵。必先謀定而後戰。善能以小擊衆。治師訓練嚴整。軍中有所指顧。諸將不敢仰視。初與子儀齊名。世稱李郭論戰。功推爲中興第一。其代子儀於朔方。營壘士卒麾幟。一無所改。而光弼號令旣出。覺氣色乃益精明。雖其才優亦忠義素積也。嗚呼。臨淮以三公建大將旗鼓。闔以外。惟所主之。運籌幘幄。料敵制勝。足矣。而必納刀於鞞。以示必歿。卒能再造唐室。書名太常者。蓋有歿無貳之心爲之也。或問岳武穆天下何時太平。曰。



文臣不愛錢武臣不惜死。天下太平矣。使百爾有位  
能如楊伯起之却金暮夜李臨淮之納刀韉中天下  
豈有不太平者哉。甚矣岳武穆之言不可不三復也

剖腹明心




安金藏。京兆長安人。在太常工籍。睿宗爲皇嗣。少府監裴匪躬。中官汜雲僊。坐私謁皇嗣。皆殊死。自是公卿不復見。唯王優給。使得進。俄有誣皇嗣異謀者。武后詔來俊臣問狀。左右畏慘楚。欲引服。金藏大呼曰。公不信我言。請剖心以明皇嗣不反也。引佩刀自刺。腹中五臟並出。流血被地。眩而仆。后聞大驚。輿致禁中。命高醫却納五臟。以桑白皮爲線。縫合。傳之藥。閱夕而蘇。后臨視。歎曰。吾有子不能自明。不如爾之忠也。卽詔停獄。睿宗乃安。神龍初。母喪。葬南門口。營石墳。晝夜不息。地本印燥。泉忽湧。流廬之側。本道使盧懷慎上其事。詔表闕於閭。景雲時。遷右武衛中郎將。元宗屬其事于史官。擢右驍衛將軍。爵代國公。詔鏡其名於泰華二山碑。以爲榮。卒配享睿宗廟廷。

此一幅像。是寫安金藏殺身成仁之忠也。金藏。京兆長安人。隸太常樂工籍。睿宗爲皇嗣時。少府監裴匪躬。中官汜雲僊。坐以私謁皇嗣。皆殊死。殊死。漢斬刑也。自是公卿不復得見。唯樂工優人。以供給使令。進俄有誣告皇嗣有異謀者。武后詔來俊臣鞠之。時俊臣酷虐。左右畏刑。訊慘楚。欲誣引服。金藏大呼曰。皇嗣無異謀。公如不信我言。請剖心以明皇嗣不反也。

引佩刀自刺。腹中五臟並出。流血滿地。昏眩顛仆。武  
后聞之大驚。命以輿舁至禁中。令高醫却納五臟於  
腹。以桑白皮爲線。縫合其所刺處。用良藥敷其上。閱  
一夕方醒。后親臨視。歎曰。吾有子負屈。不能自明。諸  
人無敢言者。爾獨剖腹稱其不反。真不如爾之忠也。  
卽詔停獄。睿宗乃安。神龍初年。其母歿。葬於南門口。  
親營石墳。晝夜不息。地本高燥。忽有泉湧出。流於廬  
側。本道使盧懷慎上其事。詔表闕於門閭。以旌之。景  
雲年間。遷右武衛中郎將。元宗以其事宣付史館。已  
又擢右驍衛將軍。爵代國公。詔刻其名於秦華二山  
碑石。以榮之。及卒。配享睿宗廟廷。夫安金藏。樂工也。  
義激於衷。不惜披肝瀝胆以明之。卒使國本弗搖。宗  
社如故。身雖微末。功且與浴日等矣。其爲親營葬。泉  
湧廬側。誠固可以貫金石歟。表闕門閭。鑿名秦華。奇  
忠大孝。卓立千古。嗚呼盛哉。

獨立不懼



薛瑄字德溫。山西河津人。父貞。洪武初年領鄉薦。爲真定元氏教諭。母齊氏。夢一紫衣人謁見。已而生瑄。永樂己亥。貞改河南鄆陵。瑄補鄆陵諸生。中河南庚子鄉試第一。明年辛丑。登進士第。及父喪服闋。宣廟思得良憲。臣擢瑄雲南監察御史。出監湖廣銀場。正統紀元有言學政不舉者。吏部尚書郭璉薦瑄提學山東學校。瑄首以朱子白鹿洞學規開示學者。諸生皆呼爲薛夫子。太監王振之專政也。問閣臣曰。吾鄉亦有可爲京堂者乎。卽以瑄對。召爲大理少卿。瑄至京。宿朝房。閣臣過詢不值。語其僕曰。可語若主。明日詣王太監。若主之擢。是王太監力。瑄聞之。不往。又使人語之。竟不往。諸公知李賢素善瑄。語賢轉致。言振數問之也。賢至朝房道意。瑄曰。原德亦爲是言乎。一日會議東閣。公卿見振皆拜。一人獨立。知其爲瑄也。振連揖之。自是銜瑄矣。會有指揮某歿。振姪王山欲娶其妾。其妻不可。妾因誣妻毒殺其夫。都察院已誣服。瑄爲辯寃。駁還至三。都御史王文大怒。承振風旨。誣瑄出入人罪。振嗾言官劾瑄得賄。故庇歿獄。瑄遂逮繫當歿。及至午門會審。瑄呼王文字曰。若安能問我。若爲御史長。自當迴避。文怒。奏瑄不服。問理。詔縛詣市殺之。門人皆奔走哭。而瑄神色自若。會振有老

僕。是日大哭厨下。振問何哭。僕對曰。聞今日薛夫子將刑故也。振聞而意解。適有兵部侍郎王偉申救。遂傳詔赦免。瑄家居六年。正統己巳。以吏科給侍中程信論薦起爲大理寺丞。景泰初。懇乞致仕。學士江淵上疏留之。明年陞南京大理寺卿。中官金英奉使出南京。公卿俱餞江上。瑄獨不往。英至京。言於衆曰。南京好官。唯薛卿耳。壬申秋。召至京。復爲大理寺卿。是歲瑄近七十。復乞致仕。不允。英廟復位。素知瑄學行。遷禮部右侍郎兼翰林院學士。入內閣。知制誥。一日上御便殿。召瑄入。語移時。尋命主考會試。事竣轉左。瑄見將臣石亨等竊弄威權。歎曰。君子見幾而作。遂引疾。懇乞致仕。居家八年。四方學者從之。甚衆。所著有讀書錄行於世。河汾集藏於家。卒年七十三。天順八年也。謚文清。劉文安嘗請以公從祀廟庭。今從祀。

此一幅像。是寫薛文清特立不懼之忠也。文清公姓薛。名瑄。字德溫。山西河津人。父名貞。洪武初年領鄉薦。初任爲元氏教諭。母齊氏。夢一紫衣人謁見。已而生瑄。永樂己亥。貞改任河南鄆陵。瑄補鄆陵諸生。中河南庚子鄉試第一。明年辛丑。登進士第。及父喪服闋。宣廟思得良憲臣。擢瑄雲南道監察御史。奉差出

監湖廣銀場。正統紀元。有言學政不舉者。吏部尚書郭璉薦瑄提學山東學校。瑄首以朱子白鹿洞學規開示學者。由是諸生皆呼爲薛夫子。時太監王振專政。問閣臣曰。吾鄉亦有可爲京堂者乎。卽以瑄對。乃召爲大理少卿。瑄至京宿朝房。閣臣過而詢之。偶不相值。語其僕曰。可告汝主。明日可詣王太監謝之。汝主得擢京堂。是王太監力也。瑄聞之不往。又使人語之。竟不往。諸公知李賢素善瑄。語賢轉致言於瑄。言振數數問之。賢至朝房。道意。瑄曰。原德君子。亦爲此言乎。一日會議東閣。公卿見振皆下拜。惟一人獨立不動。振知其爲瑄。連揖之。自是銜恨瑄矣。會有指揮某歿。振姪王山欲娶其妾。其妻不可。妾因誣告其妻毒殺其夫。都察院問。已誣服罪。瑄爲辯其冤枉。駁還。三次。都御史王文大怒。於是承振風旨。誣瑄出入人罪。振嗾言官劾瑄得賄賂。故庇死者獄。瑄遂逮繫當歿。及至午門會審。瑄呼王文字曰。若安能問我。若爲御史長。自當迴避。文怒。乃奏瑄不服。問理。詔縛瑄詣市殺之。門人皆奔走哭泣。瑄神色自若。會振有老僕。是日大哭厨下。振問何哭。僕對曰。聞今日薛夫子將受刑故也。振聞僕言。意遂解。適有兵部侍郎王偉申

救遂傳詔赦免。瑄家居六年。正統己巳。以吏科給事中程信論薦。起爲大理寺丞。景泰初。懇乞致仕。學士江淵上疏留之。明年陞南京大理寺卿。中官金英奉使出南京。公卿俱餞江上。瑄獨不往。英至京。言於衆曰。南京好官。唯薛卿一人耳。壬申秋。召至京。復爲大理寺卿。是歲瑄近七十。復乞致仕。不允。英廟復位。素知瑄學行。乃遷禮部右侍郎兼翰林院學士。入內閣。知制誥。一日上御便殿。召瑄入。語移時。尋命主考會試。事竣轉左。瑄見將臣石亨等竊弄威權。乃歎曰。君子見幾而作。遂引疾。懇乞致仕。居家八年。四方學者從之甚衆。所著有讀書錄行於世。河汾集藏於家。卒年七十二。天順八年也。謚文清。劉文安嘗請以公從祀廟庭。今從祀。按薛文清理學名臣也。跡其獨立不懼。如百草萎歿。而松栢挺然獨秀。非天下之至剛。其孰能與於此。老僕垂涕。金英刮目。秉彝之好。反在宦寺奴隸間。此心此理。無物不有。諒哉。



君臣一德



劉忠宣名大夏字時雍華容人也。舉鄉試第一。明年爲天順八年。中會試。又明年。廷試高等。改翰林院庶吉士。居二載。解館當留。而大夏自請試吏。授兵部職方司主事。遷員外郎。進車駕司郎中。還爲職方司。大夏之郎中。職方也。明練於天下事。所奏覆多當上意。大司馬倚之。若左右手。是時中貴人汪直與保國公威寧伯創邊釁。大夏抑紕之時。時扼腕。安南黎灝破侵占城地。西略諸土彘。敗於老撾。中貴人汪直欲乘間討之。使索英公下安南牘。大夏匿弗予。尚書爲榜吏至再。大夏密告曰。釁一開。西南立糜爛矣。尚書悟。乃已。時朝廷好寶玩。中貴言宣德中嘗遣太監王三保使西洋。獲奇珍異貨無算。帝乃命中貴至部查王三保至西洋時水程。項襄毅公令都吏檢故牘。大夏先檢得匿之。都吏檢不得。復令他吏檢。項公詰都吏曰。署中牘焉得失。大夏微笑曰。王三保下西洋時。費錢穀數十萬。軍民歿者亦萬計。此一時弊政。牘卽在。尚宜毀之。以拔其根。猶追究其有無耶。項公聳然再揖而謝。指其位曰。此不久屬公矣。朝鮮貢道由鴨鵝關。迂廻數十程。奏請由鴨綠江便。大夏謂由鴨綠江便。誰不知。顧迂之而待今日。始有微意。乃勿許。尋大同師失律。倉卒告警。大夏規謂兵食有餘。太宰才之。

欲以爲少司馬。不則太僕卿。而大夏亟請外。得福建叅政。已遷廣東右布政使。嘗過厓山。弔大忠祠。及宋慈元后陵。泫然曰。后與陸張二臣同歿國。今大忠有祠。而慈元不祀。義弗稱。乃謀立廟。人感其義。不日而就。轉浙江左布政。去廣東陳憲章。以道學自命。少許可。獨與大夏善。嘗稱曰。劉公愛民如子。守身如女。母論於今人中。卽古人亦未易當也。弘治六年。河決張秋。詔進大夏右副都御史。往治河。祀河神。而所焚帛灰。結若人形。物議洶洶。大夏不動。乃自上流孫家渡。䟽其壅。可三十里。復䟽四府營之壅。可十里。聯長隄。以分大。名山東水勢。而別河張秋之南。以通運艘。五旬而河就馴。運艘無滯。功重而費輕。逾於徐友貞甚。璽書褒賞。入爲戶部左右侍郎。十年出治邊餉。或曰。邊糧草半屬京貴子弟。此行剛且取禍。公曰。處天下事。以理不以勢。定天下事。在近不在遠。俟至彼圖之。至邊。召問父老。得其要領。乃榜通衢云。某倉缺糧幾千石。每石給官銀若干。凡境內外官員客商家。願輸者。米自十石上。草自百束上。聽卽中貴子弟不禁也。蓋往時買糧。必百千石。草必千萬束。方聽。以故貴子弟爭相爲市。轉買邊人糧草。續運牟利。此法立。有糧草家自得告輸。貴子弟卽欲收糴。無所得。邊人言自

劉侍郎收市法行。倉塲有餘積。而私家有餘財矣。十一年。三上章乞致仕。歸築草堂居之。天下因稱曰東山先生。十三年。廣東西督撫缺。卽家起右都御史。其吏人思大夏遺愛。鼓舞稱賀。大夏亦精心無倦。一時肅然。盜賊衰止。在廣東西一歲所。再求去。皆不許。十三年。召爲兵部尚書。力辭。復不許。旣廷謝。上御幄殿。召問之曰。朕數用卿而數辭疾。何也。大夏對曰。臣老且病。今天下民窮財盡。萬一不虞。責在兵部。臣自度力不足辦。故辭耳。上默然。居數日。復召問曰。徵歛俱有常。何至今日。獨言民窮財盡。大夏對曰。正謂其不盡有常耳。他固未暇論。臣在廣時。廣西取鐸木。廣東市香藥。費固以萬計。上曰。卿嚮者言之。固已停止矣。其他徵歛。可一一議而革也。於是上益察知大夏廉。且練事。時左都御史戴珊。亦以材見知。上當常朝。坐金臺。有宣。必大夏。再宣。必珊。而御文華有所召對。亦必大夏與珊偕。時虜素犯邊。而太監苗達者。在延綏。嘗有克獲。乃以捷聞。上噐之。問大夏曰。卿在廣。知苗達乎。延綏至今少息肩矣。大夏對曰。臣在廣。不知。朕問之。從征將士。所俘獲婦稚十數耳。幸彼深入。不相值。值之。則無噍類也。上曰。卽爾。太宗何以屢得志。大夏對曰。陛下神武。固不後太宗。而將領士馬。不能十

二。且其時淇國公一小違節制。舉十萬衆悉委之沙漠。柰何易言之。度今上策。惟有守耳。戴珊亦從旁贊決。上與遽曰。微二人。幾爲所悞。刑部尚書閔珪持法忤旨。上與大夏語及之。大夏對曰。法司持法任怨。而使以恩歸。上似未足深怒。上曰。古亦有之乎。對曰。孟子云。舜爲天子。臯陶爲士。執之而已。上徐曰。珪第執之過耳。老成人何可輕棄。竟允珪請。一日問諸衛所卒強可用否。大夏曰。嚮者臣但言民窮而卒窮殆甚。上曰。在衛有月糧。征戍有行糧。何乃窮甚。對曰。江南困轉漕。江北困京操。他困又不止此。且所謂月糧行糧者。半與其帥共之。上歎息曰。朕在位久。不能知。何名爲人主。居數日。令九卿大臣各言軍民弊政。莊浪土帥魯麟爲甘肅副將。求大將不得。恃其部落強。徑歸莊浪。以子幼請告。有欲予之大將印者。有欲召還京處之散地者。上問大夏。對曰。彼虜不善用其衆。無能爲也。然未有罪。今予之印。非法召之。不至損威。乃爲疏。獎其先世之忠順。而聽其就閒。麟卒快。快病死。上復謂大夏京輔左右肘。吾欲各宿兵其地。大夏乃因御史議。請以保定操卒萬人還之。鎮以爲西衛。而東兵納之。密雲薊州以爲東衛。報可。中貴人監京營者。恚失兵。造飛語揭之宮中。上示大夏曰。禁地豈外人

所能及。不過此曹子。不利於失兵耳。又問大夏兵餉何以常乏。大夏對曰。臣無暇及他鎮。臣在廣。廣之會城。撫按摠兵三司供億。不能敵一。中貴人。餉何以不乏。上曰。然。第祖宗來。設置已久。安能遽削。今必令廉如鄧原麥秀者而後補。不然。姑闕焉可也。司禮監太監陳寬。選坐營中貴人。上面命大夏偕。大夏對曰。故事。獨太監專之。非外臣所與聞。上曰。豈憂此曹惡汝耶。我在何憂。卒命大夏與英國公懋偕康徃。而中貴人苗璋恃夙貴。耻不肯與選。上業許之矣。既而謂大夏不至。卽參奏。大夏曰。如前旨何。上曰。吾雖意許之。未發也。何謂旨。既而璋果不來。大夏與陳寬等參上。上切責璋。示若逮繫者。而始宥之。上復語大夏。諸司言弊政詳矣。而不及御馬監光祿寺者何。夫弊莫甚於此二曹。大夏曰。上悉之。幸甚。在獨斷而力行之耳。無何。特勅兵部侍郎同給事御史清理。歲省費十餘萬金。自是中貴人聞而有側目。大夏者矣。上嘗語大夏。一侍郎才足任艱大。大夏不對。再言之。又不對。上悟曰。吾所言者才。不暇及大節。卿不對者是也。既而大夏亦稱一侍郎才。上曰。劉健亦稱之。其人負虛名而寡實用。且擅作威福。上又言健復稱其鄉人某。甚不合朕意。後知之。乃都御史劉宇也。宇竟以媚逆瑾。

敗。而兩侍郎者。亦皆不稱。上自是益信大夏。與戴珊。賞資金幣。肴醴無虛月。至以玉帶麒麟服。賜大夏。上一日召對。良久。曰。述職者集矣。諸用事大臣皆杜門。若二卿門。何必杜也。因各手白金一錠。授之。曰。小佐而廉。且屬毋廷謝。恐他人或觖望。一日欲有召。大夏在班。而上不見。次日諭大夏。吾欲召汝。汝不在班。不免御史糾。故已之。且恐汝同列有忌者。珊以老病乞骸骨。屬大夏一從。上謂珊。卿何以亟求去。珊不敢對。大夏爲言。珊實病。且用身率先御史。而病弗勝。御史當見彈射。不便。上曰。主人留客堅。客且爲強留。珊獨不能爲朕留耶。且天下尚未平。何忍舍朕。已。泫然者久之。珊與大夏皆叩首泣出。而相謂曰。歎此官矣。鄭端簡曰。修清寧宮。有旨下部役軍萬餘人。公請減十五。督工者訴上。上令內臣語內閣。擬旨詰責。洛陽曰。惜軍力。兵部職。近劉尚書輒以老辭。朝廷下溫旨勉留。尚請未已。若詰責。彼將以不職固辭。更於何處得如此人用。上欣然如公議。嘗召諭曰。事有不可。每欲召卿議。又以非卿部事而止。後有當行罷者。卿揭帖啓朕。公對不敢。上問何也。曰。先朝李孜省可戒。上曰。卿與朕論國事。豈孜省比。曰。臣下以揭帖進。朝廷以揭帖顯行。何異前代斜封墨勅。陛下宜遠法帝王。

近法祖宗。事之可否。外付府部。內咨內閣。如用揭帖。上下俱有弊。上稱善。又問近日外議云何。曰。近有旨釋李夢陽。中外懽呼聖德如天地。上曰。夢陽指斥戚畹。且語言狂妄。朕不得已。下詔獄。比奏上。朕試問左右云何。應曰。付錦衣撻而釋之。朕知此輩得旨。卽重責致死。以快中宮之怒。使朕受殺直臣名。不忠如此。朕以故釋復職。一日上召公入御榻前。上左右顧近侍內臣退避去。奏事畢復來。公對久。欲起不能。上命大監李榮掖公出。榮且扶且請曰。吾輩行事多失。老先生幸隱惡揚善。公曰。聖上天性聰明。某今日求退。上曰。李榮每稱卿。某於老太監踪跡踈遠。何以得此。榮曰。當朝大臣。公名第一。榮何敢蔽賢。正德元年。加太子太保。公平生不以勢位自居。有疑未明者。不以公移顯行。雖屬官亦具手簡直述其事。紙尾書名。以故所委無不盡心。李東陽曰。東山乃昔人所謂與物無競。臨事有爲者也。弇州外史曰。大夏仁心爲質。道揆法守。晚際魚水。密勿都俞。庶幾有三代之風。所恨造膝之語。少有傳者。

此一幅像。是寫劉忠宣君臣魚水。都俞將順之忠也。劉公名大夏。字時雍。華容縣人。舉鄉試第一。天順八年。中會試。廷試高等。改翰林院庶吉士。居二載。解館。



當留。乃自請試吏事。授兵部職方司主事。已遷員外郎。進車駕司郎中。還爲職方司。於天下事多練習。奏覆輒當上意。本兵倚如左右手。是時中貴汪直與保國公威寧伯比周。創起邊釁。大夏絀之。時時扼腕。安南黎灝破。侵占城地。西畧諸土。彝敗於老撾。汪直欲乘間討之。索英公下安南牘。大夏匿弗予。尚書榜吏至再。大夏密告曰。此釁一開。西南立糜爛矣。尚書悟而止。時上好寶玩。中貴言宣德朝嘗遣太監王三保使西洋水程。項襄毅令都吏檢故牘。大夏先檢得匿之。都吏檢不得。復令他吏檢。公詰都吏曰。署中牘焉得失。大夏微笑曰。王三保下西洋時。費錢穀數十萬。軍民歿者亦萬計。此弊政牘在。尚當毀之。令去其根。猶追究其有無耶。項公聳然再揖而謝。指其位曰。此不久屬公矣。朝鮮貢道。向由鴉鶻關。迂迴數十程。奏請由鴨綠江便。大夏言鴨綠江便。誰不知之。豈待今日始識。此中殆有微意。乃勿許。大同師失律。倉卒告警。大夏規畫。言兵食有餘。太宰以爲才。欲晉少司馬。否則太僕卿。大夏急請補外。得福建叅政。已遷廣東。右布政使。過厓山。弔大忠祠。及宋慈元后陵。泫然曰。后與陸秀夫張世傑二臣同歿國難。今大忠有祠。而

慈元無專祀。其義弗稱。乃謀立廟。人感其義。不日告成。轉浙江左布政去。廣東陳獻章。以道學自命。少所許可。獨與大夏善。嘗稱曰。劉公愛民如子。守身如女。母論於今人中。卽古人亦未易當也。弘治六年。河決張秋。詔進大夏右副都御史。往治河。祀河神。所焚帛灰。結如人形。物議洶洶。大夏不爲動。乃自上流孫家渡。䟽其壅。可三十里。復䟽四府營之壅。可十里。聯長隄。以分大名山東水勢。而別河於張秋之南。以通運艘。凡五旬。河就馴。運艘無滯。功重費輕。過徐有貞。遠甚。輒書褒賞。入爲戶部左右侍郎。十年。出治邊餉。或

告曰。邊糧草半屬京中貴人子弟。此行如太剛。則必取禍。公曰。處天下事。以理不以勢。任天下事。在近不在遠。俟至彼圖之。至邊。召問父老。盡得其要領。乃揭榜通衢。云某倉缺糧幾千石。每石給官銀若干。凡境內外官員客商家願輸者。米自十石以上。草自百束以上。悉聽。卽中貴子弟不禁也。蓋往時買糧必百千石。草必千萬束。方聽。以故貴子弟爭相爲市。轉買貴人糧草。續運牟利。此法旣立。有糧草家自得告輸。貴子弟卽欲收糴。無所得。邊人皆言自劉侍郎收市法行。倉場有餘積。而私家有餘財矣。十一年。三上致仕

章歸築草堂居之。天下稱爲東山先生。十三年。廣東西督撫缺。卽家起右都御史。其吏人思大夏遺愛。鼓舞稱賀。大夏亦精心於政事。略無倦意。威行盜息。居一歲。再求去。上不許。十三年。以兵部尚書召。力辭不得。旣廷謝。上御幄殿。召問曰。朕屢用卿。屢以疾辭。何也。對曰。臣老多病。值今民窮財盡。萬一有變。軍政責在兵部。臣自度力不足辦。是以辭耳。上默然。居數日。復召問曰。國家徵歛。俱有常法。何今日獨民窮財盡。對曰。正謂其不盡有常耳。他未暇論。臣在廣時。廣西取鐸木。廣東市香藥。費以萬計。此額外科索。民窮財盡。略可見矣。上曰。卿向言之。已經停止。其他徵歛。可盡議革。上益知大夏廉。且練事。時左都御史戴珊。亦以材受知於上。當常朝坐金臺。有宣召。必大夏再宣。必珊。其御文華。有所召對。亦必大夏與珊偕。時寇數犯邊。大監苗達在延綏。嘗有尅獲。上噐之。問大夏曰。卿在廣。知苗達乎。延綏至今少息肩。大夏對曰。臣在廣不知。然問之。從征將士。所俘獲婦稚十數耳。幸深入不相值。值則無噍類也。上曰。太宗何以屢得志。對曰。陛下神武。不後太宗。而將領士馬。不能當什之二。且其時洪國公一小違節制。舉十萬衆。悉委之沙漠。

柰何易言之。度今上策。惟有守耳。戴珊亦從旁贊決。上遽曰。微二人。朕幾爲所悞。刑部尚書閔珪持法忤旨。上與大夏語及之。大夏對曰。法司持法任怨。而使以恩歸上。似未足深怒。上曰。古有之乎。對曰。孟子云。舜爲天子。臯陶爲士。執之而已。上徐曰。珪第執之過耳。老成人何可輕棄。竟允珪請。一日問諸衛所卒強可用否。大夏曰。嚮者臣但言民窮。而卒窮更甚。上曰。在衛有月糧。征戍有行糧。何乃窮甚。對曰。江南之卒困轉漕。江北之卒困京操。他困又不止此。且所謂月糧行糧者。帥事朘削。半與共之。上歎息曰。朕在位久。此不能知。何名爲人主。居數日。令九卿大臣各言軍民弊政。莊浪土帥魯麟爲甘肅副將。求大將不得。恃其部落強。徑歸莊浪。以子幼請告。廷臣共論有欲予之大將印者。有欲召還京處之散地者。上問大夏對曰。彼暴虐。雖有衆。不善用之。何能爲。然未有顯罪。若因其請而予之印。其他土帥效尤。將何以爲訓。設召之還京。彼抗不奉命。則又損威重。乃爲䟽獎其先代之忠順。而聽其就閒。麟計不能行。卒怏怏病歿。上復謂大夏京輔如左右肘。吾欲各宿兵其地。以爲護翼。大夏乃因御史建議。請以保定操卒萬人還之。鎮以

爲西衛。而東兵納之密雲薊州。以爲東衛。旨報可。中  
貴人監京營者。怒失兵。造飛語揭之官中。上以示大  
夏曰。禁地豈外人所能及。不過此曹子不利於失兵  
耳。又問大夏兵餉何以常乏。大夏對曰。臣無暇及他  
鎮。臣在廣。廣之會城撫按總兵三司供億不能敵一  
中貴人。餉何以不至缺乏。上曰。然。第祖宗朝來。設置  
已久。勢難遽削。今必使廉潔如鄧原麥秀其人者。然  
後聽補。否則闕焉可也。司禮監陳寬選坐營中貴人。  
上面命大夏偕。大夏對曰。故事。獨太監專之。非外臣  
所與聞。上曰。豈憂此曹惡汝耶。我在。復何憂。卒命大  
夏與英國公懋偕寬往。中貴人苗璋自倚早貴。耻不  
肯與選。上業許之。旣而謂大夏不至。卽叅奏大夏曰。  
如前俞旨何。上曰。吾雖意許之。未發也。何名爲旨。璋  
果不來。大夏與陳寬等叅上。上切責璋。示若逮繫者  
而始宥之。上復語大夏。諸司言弊政頗詳。若御馬監。  
光祿寺。積弊尤甚。獨無及者。何也。大夏曰。上知之幸  
甚。但在獨斷力行。則革之易耳。已而勅兵部侍郎同  
給事御史清理。歲省費約十萬餘金。中貴人聞之。側  
目。上嘗語大夏。一侍郎才。足任艱大。大夏不對。再言  
之。又不對。上悟曰。朕所言者才。不暇及大節。卿不對

者是也。既而大夏亦稱一侍郎才。上曰：劉健亦稱之。其人負虛名，少實用。且擅作威福。上又言：健復稱其鄉人某，甚不合朕意。後知之，乃都御史劉宇。宇竟以媚瑾敗，而兩侍郎亦不稱。上自是益信大夏與戴珊。常賚金幣，肴醴無虛月。至以玉帶麒麟服賜大夏。上一日召對，良久曰：述職者集，用事大臣皆杜門。若二卿門何必杜？因各手白金一錠授之，曰：小助爾廉。又囑勿廷謝，恐他或怨望。一日欲有召，大夏在班，而上不見。次日諭大夏：吾欲召汝，汝不在班，不免御史彈糾。故已之。且恐同列有忌汝者，珊以老病欲乞骸骨。

托大夏一贊成。上謂珊卿何以屢求去，珊不敢對。大夏爲言：珊實有病，且爲御史率先，而病不能勝任。當見彈射，頗爲不便。上曰：主人留客甚堅，客且爲主人留，珊獨不能爲朕留耶？且天下尚未平，何忍舍朕去。已泫然久之。珊與大夏皆叩首泣，出相謂曰：歟！此官矣。鄭端簡曰：修清寧宮，有旨下部，役軍萬餘人。公請減十之五。督工者訴上。上令內臣語內閣擬旨詰責。洛陽曰：惜軍力，兵部職。近劉尚書輒以老辭，朝廷屢下溫旨，勉留尚請未已。若加詰責，彼將以不職固辭。更於何處得如此人用？內臣以告。上欣然如公議，減

之。嘗召諭曰。事有不可。每欲召卿議。又以非卿部事而止。後有當行罷者。卿揭帖啓朕。公對不敢。上問何也。曰。先朝李孜省可戒。上曰。卿與朕論國事。豈孜省比。曰。臣下以揭帖進。朝廷以揭帖顯行。何異前代斜封墨勅。陛下宜遠法帝王。近法祖宗。事之可否。外付府部。內咨內閣。如用揭帖。上下俱有弊。上稱善。又問近日外議云何。曰。近日旨釋李夢陽。中外懽呼聖德如天地。上曰。夢陽指斥戚畹。語言狂妄。朕不得已下詔獄。比奏上。朕試問左右云何。應曰。付錦衣衛撻而釋之。朕知此輩得旨。卽重責致死。以快中宮之怒。使

朕受殺直臣名。不忠如此。朕以故釋之。復職。一日上召公入御榻前。上左右顧近侍內臣退避去。奏事畢復來。公對久。欲起不能。上命太監李榮扶公出。榮且扶且請曰。吾輩行事多失。老先生隱惡揚善。公曰。聖上天性聰明。某今日求退。上曰。李榮每稱卿。某於老太監踪跡。踈遠何以得此。榮曰。當朝大臣。公名第一。榮何敢蔽賢。正德元年加太子太保致仕。公平生不以勢位自居。有疑未明者。不以公移顯行。雖屬官亦具手簡直述其事。紙尾書名。以故所委無不盡心。李東陽曰。東山乃昔人所謂與物無競。臨事有爲者也。

弇州外史曰。大夏仁心爲質。道揆法守。晚際魚水。密勿都俞。庶幾有二代之風。所恨造膝之語。少有傳者。後人不得而知。良可惜也。按讀書至喜起明良之歌。君臣一體之誼隆矣。及觀孝宗之與大夏。經邦論道。敬天勤民。未雨而綢繆。先事而爲備。交咨互儆。相得益彰。易稱天道下濟。地道上行。泰交之盛。三代而後。鮮有儷者。說命曰。木從繩則正。后從諫則聖。孝宗有焉。陸贄云。上不負天子。下不負所學。大夏之謂矣。嗚呼。懿哉。



